

伏跗室藏书题记选辑

冯贞群著 骆兆平辑

伏跗居士冯贞群先生是现代浙东著名藏书家，也是一位版本目录学家。他在收集和保存伏跗室藏书过程中，对古代典籍作过深入研究，写下了不少题记。

伏跗室藏书题记散见于各书之中，内容大多记述书籍版本、入藏时间及来源。其中四篇已刻入《四明丛书》，六篇刊登在《图书季刊》一九三九年新第一卷第四期上，此外未见发表。

伏跗室藏书于一九六二年四月全部捐献给国家，当时新华社有详细报导。我们在整理编目的同时，集得题记近百篇。这里从未刊文中选录记事、论学之要者十八篇，以为文献研究者之助。

尚书注疏

（汉）孔安国传 （唐）孔颖达疏 明嘉靖刻本

《尚书注疏》二十卷，六册、皮纸印者，昔岁以廉值得之西门天禄阁，脱首三卷。越二十二年六月，访获首册，遂成完书，不胜欣幸！册首有“山阴何士祁震无咎斋藏”朱文长印。此为明嘉靖中福建巡按御史李元阳依宋本刊于闽中，世号闽刻九行本。宋绍熙间三山黄唐所刻《六经》，南渡时所刻十行本《十三经注疏》，其经文皆大字居中，注作小字双行，正义则以疏字隔之。此本注亦居中，较经文差小，始改宋以来注疏旧式矣。其版后归南京国子监，谓之南监本。厥后万历时祭酒李长春等覆刊于北京。

国子监，崇祯间常熟毛晋又刻于汲古阁，展转传雕，伪夺弥甚，远不及此祖本之善也。贞群弱冠以后，访求书策，阅本经典屡历予目，以为常有，未及购藏，不图二十年来稀如星凤矣。则是书者聊慰我情于万一云尔。装修告成，并记岁月，民国二十年辛未孟秋之月二十六日冯贞群识于临水宦。

孙月峰批评史记

（明）孙矿批评 明崇祯九年冯元仲刻本

《孙月峰批评史记》百三十卷，《褚先生附录》一卷，为九世族祖明征君次牧翁刻于崇祯九年者。版片久毁，殆孤本矣。删其诸表非法也。较阅姓氏，多署名流，标榜之习，寢为朋党，明季风尚大抵如斯。是书为妇之从伯陈尺珊知州受颐旧藏，壬戌闰五月归于我。先人刻书，获返其家，征君有灵，当亦欢然！朱笔评点出于乡先顾诸生櫚，且录陈明卿、钟伯敬诸评，卷一之端有“甲戌仲秋阅”朱书五字，盖乾隆十九年也。故有“顾櫚嵩乔氏鉴沙平阅珍藏”、“顾小癡书画记”、“伴梅草堂所藏书籍”、“顾氏鉴沙赏阅”印记。后归镇海姚举人燮，加有“某伯复庄大某山馆藏”印。惟“观我生”、“蝶仙”、“研霏居士”三印不审何人？征君以诸生应徵，策文刺时，黜授县丞，归隐汤山，辟天益山堂，雕刻书帖，法制名墨，东南名士皆与之交，有遗集传世。鉴沙善绘、弹琴，咏歌，萧然物外。某伯长诗文，度曲工画。顾、姚二子著作等身，结客好游，文采风流，足与征君偶鼎足焉。征君所刻别有《孙月峰批评书诗、礼三经》、《汉书》，记目于此，容续访之。十五年丙寅七月三日九世族孙冯贞群谨跋。

孙月峰批评汉书

（明）孙矿批评 明崇祯七年天益山堂刻本

童时闻王父谈九世族祖次牧翁故事。翁在城东构天益山堂别业，极园林之胜。喜刻典籍。老益穷困，目无所见，至析书板以为薪焉。壬戌五月得其所刻《史记》十册，读其凡例，知先有《汉书》之刻。九月二十八日徘徊鄞城县前街，方除道涂，工匠邪许，行人幢幢，泥路崎岖，隘不能走，入书肆惕焉。抽架上书，见牙签题《孙月峰批评汉书》，疑为天益山堂刻本，视之果然，乃市之归。清乾隆初，翁曾孙廷楷编刻遗集，《史》《汉》二序均未录入，可见传本之稀。载阅二百，一旦合并，深以为幸。装修告毕，补其阙文，辄记于端。丙寅仲冬十有三日冯贞群。

东都事略跋

（清）汪琬撰 抄本

偶过天封浮图，访孙君翔熊于蜗寄庐，见案头有汪尧峰《东都事略跋》写本，前钤“德星堂图书记”、“四明卢氏抱经楼藏书印”，盖未上板者。时予注《石林避暑录话》，颇可采引，遂假归，手景一本，半月而竟。男子昭适方治史学，乃以贻之。新得钱绮《东都事略校勘记》二卷刻本，书以志幸。

宋史于群史中号为繁芜。柯维麒、陈黄中重修之本，若存若亡。故邵晋涵续王偁书成《南都事略》百六十卷，文简事增，足正宋史。稿藏山阴沈复粲家，后人以献曾文正公，付刻未果，为洪琴西汝奎所得，不知今尚存否乎？民国十六年丁卯十月十四日灯下冯贞群。

李氏萱荫楼书目

（民国）李庆城编 抄本

五月十五日过鄞志馆，于马君涯民瀛案头见《萱荫楼书目》写本二册，假归录之。时历半月，方始写讫。间为嫁妹贞俞，授

从子昭迈室，及病腰痛中辍十日，昼夜手录者仅七日耳。是楼之书，向为吾友蔡明存同常所藏。忆昔年明存向其族人某收书时，延贞群为之鉴定。中若《明代实录》、《国榷》，闻人铨刻《旧唐书》，元版《通志》、《文献通考》、《吾学编》、《百家类纂》、《武英殿聚珍版丛书》、《洺水集》、《蔡忠惠公文集》、《屏山集》等数百种（计百余篋），有抱经楼卢氏藏印者皆是也。明存先人墨海楼所蓄者，以大某山馆藏书居多。后以商业折阅，将所有典籍以银四万版尽归之李氏。吾见其入，又见其出，可慨也！清光宣以来，四明藏书散之四方者，若范氏天一阁，卢氏抱经楼，徐氏烟屿楼，董氏六一山房，陈氏文则楼。吾乡则郑氏二老阁，董氏春风草庐，冯氏耕余楼、醉经阁，难俚指数。今蔡氏之书尚未越境，不可谓之不幸也。是目分别部居，所定版本多未确当，姑就所知略为修正，附注于末，故与原目颇有异同。钞校卒业，辄为之跋。民国二十二年六月三日慈谿冯贞群。

黄帝内经太素注

（隋）杨上善撰 清抄冯一梅校本

杨上善《黄帝内经太素注》三十卷，存卷八、卷九、卷二十五、卷二十六，凡四卷二册，写本。为族祖梦香举人一梅手校，用墨笔、朱笔、青笔三色，取斟日本钞本、袁氏刻本。庚辰季春以币四版易而有之。所谓袁本者，谓桐庐袁爽秋太常昶浙西村舍丛刻三十卷本也（附内经明堂一卷）。族祖为浙江官书局校刊医经，世号善本。当时有拟重刻古医书目二十五种，上之局长，未及举行。此本校勘精善，足以取法。民国二十九年六月十五日冯贞群记。

杨上善《黄帝内经太素》三十卷，自南宋后湮没者殆六百年。清光绪初，杨守敬游日本，访得携归。卷后记仁平元年仁安二年书写校正，当宋绍兴二十一年与乾道三年也。袁爽秋刻入

《浙西村舍丛刊》。廖季平《六译馆丛书》有其序目。（黄以周《太素经》校本序，廖宗泽《太素篇目》，廖平《隋杨氏太素注本目录》）余均未见，记目待访。成化子。

博物典汇

（明）黄道周撰 明崇祯八年刻本

《博物典汇》二十卷、六册，明黄道周撰。道周字幼玄，一字参玄，又字螭石，号石斋，漳浦人，天启二年壬戌进士，事思宗、福王、唐王，官至武英殿大学士。明亡，绝粒死，事具《明史》本传。是书作于崇祯初年，病《通典》、《通考》诸书浩博，学者难得而少读，于是删繁就简，补元明二代以成完书。其四夷末附奴酋，述清先世颇详（章炳麟云：本之天都山臣女真，考见《广百川学海》中）清乾隆中因之列入违礙书目（贞群初得一本，卷二十第十一叶末行掇去奴酋附三字，补以卷二十终四字，十一叶以下及目录二十一叶均佚，盖出于禁令后印者）。奴尔哈赤起侧微，史官之辞多不诚，独赖是书之存得以考见清开国方略。乾隆御制序云：“明臣纪本朝事迹如黄道周《博物典汇》之类不妨节取，以证信实。”《建州旧事方略》所述有官名而无主名，今此书名氏赫然具在，甚矣清官书之欺人也！是本有白文“得一居珍藏”方印，为乡先叶仲兰元堦所藏。元堦字心水，慈谿诸生，工诗，与姚梅伯，厉鹗谷倡和，刻有《赤堇遗稿》。甲子小除夕得于鄞城，中佚四、五、六卷，取他本足成之。书末未完，拾遗补阙，俟之异日。乙亥四月立夏后八日装毕跋，冯贞群。

陈思王集

（魏）曹植撰 明天启刻本

《陈思王集》十卷，附录一卷，魏曹植撰，明张燮纂。燮字

绍和，漳州举人，能文章，有声，万历间辑有《汉魏六朝七十二家集》，此其一也。张溥编《百三家集》，即以燮书为蓝本。近世溥书盛行，而燮本不显。是册仅子建单种，予更番搜采，廑乃得之，流传之渺，于是可见。清乌程严可均有校编《陈思王集》十卷，未见传本。厥后上元朱绪曾合各本校定，并从类书所引为《曹子建集考异》十卷，序录一卷，年谱一卷，零篇断句，无不掇拾，可谓《子建集》定本，稿藏江阴缪荃孙艺风堂中。甲寅十月望前一日冯贞群。

坡仙集

（宋）苏轼撰 明万历二十八年刻本

是书为先君所旧藏，卷中朱笔评点，动中肯綮。原佚首二卷，以其残缺，屏置篋中久矣。今岁二月，至西郭冷摊翻检旧书，得残本《东坡集》数十册，捆以归，秉烛整比，则《坡仙》二卷在焉，朱围烂然，与旧藏正出一手，盖即前所佚者。九叔告余，先君是书从吾邑一旧家得之，当时亦颇以残佚为惋，不图二十年来无意中忽复合并，庶足弥冥冥中之缺憾乎？！是集传本颇多，得之亦未足矜，然以先人遗籍，而合并之奇又若是，是诚非偶然者。付工装讫，辄墨数行于卷端，以识吾幸。宣统二年三月三日冯贞群孟顓记。

东观集

（宋）魏野撰 抄本

乙丑十二月二十日，孙君翔熊家行腊祭，招贞群往饮，酒阑，手《钜鹿东观集》写本见视。展卷有“抱经楼”白文长印，知为卢青厓址旧物。且言是集自宋槧后选本而外仅存传抄，亟假归手录，越十日而竟。既拾遗仲先诗，得如干首，写补其后，复编定著作考及附录各一卷殿焉。仲先隐居放歌，不屑彫琢，遗世

独立，令人神往。编写卒业，爰识岁月。民国十五年丙寅二月八日春分节冯贞群。

南雷文定

（清）黄宗羲撰 抄本

昔阅《昭代名人尺牋》，有全谢山与郑南谿假《南雷文定》五集札，知粤雅堂刻本为未尽。乙亥正月，大酉山房林集虚告我，顷收得《南雷文定》五集，叹为未见，急假之来，手写一本，自上灯夜起，越二十二日而毕。原刻本半叶十行，行二十字，单边，上下黑口、双鱼尾。每页之下黑口有白文“五集”二字，刻有圈点，悉临入之。中有数字为虫所蚀，仍作空白，不敢妄补。

顺德邓氏风雨楼活字印本《南雷馀集》一卷，计文十八首，诗一首，多出此本之外。就所知者，南雷之文尚有散佚，盖桑海时事，难以行世故耳。

《鮑埼亭集》有《南雷黄子大全集序》曰：“南雷先生之集累雕而未尽，其称《南雷文案》者凡四种，而壬辰癸巳以前所辑曰《始学庵集》不预焉。其称《南雷文定》者又四种，而壬申以后曰《病榻集》亦不预焉。先生尝欲合诸本芟定之为《文约》，未成而卒。而竟有所谓《文约》者，慈谿郑南谿喜而雕之，然不知非先生之手裁也。先生之文其深藏而不出者，盖以有待，不可听其湮没也。而在雕本中反疑多冒附之作，读者多不之审。予乃从南谿家尽取先生之草稿一一证定，皆以手迹为据，于是义熙之文毕出，而冒附者果不出予所揣，乃补其亡，汰其伪，定为四十四卷，而庐山真面目见矣。先生之文累有更窜，故多与旧所行世之本不同者，又皆以其晚年手迹为据。惜乎南谿下世，不得与共讨论之。”玩索此序，南雷行世之文固多冒附之作，且义熙之文未尽出。今世变代易，其文可以刊布，乃郑氏藏书流散殆尽，谢山编

定之本，不知尚在人间否乎？民国二十四年花朝后五日冯贞群写毕题记。

南雷文钞

（清）黄宗羲撰 旧抄本

《南雷文钞》四十六首，于宣统三年秋九月得于王斗瞻茂才奎后人所，题下注黄太冲先生笔，且玄字不讳，盖其门人所手写者。中有文一十三首，出刻本之外。今于张延章处得其远祖振寰墓志铭为补卷末，以语有讽刺，故不入集。南雷讲学甬上，尝曰：“甬上多才，足为吾薪火之传。”清代禁书，南雷之作未尽传世。求之故家，当尚有存焉者。甲午二月既望冯贞群，时年六十有九。

石园文稿

（清）万斯同撰 抄本

往读上杭刘氏《万季野先生行状》，知先生著有诗文集八卷，访求累年，讫未之见。二十二年冬，鄞县八区文献分会移送县志料来城，览其目录，有先生遗稿写本二册，发而视之，不分卷第，书根号《石园藏稿》，首列刘氏行状，刻版五页，版心题《季野先生集》，鱼尾下刻卷八，目后有男世标子建校梓一行，盖子建岁贡编次之本，欲刻未果者。乃发篋出群书，疑辨校读，采入过半，未刻者惟卦变考、书、序、记、传十六篇耳。复以《续甬上耆旧诗》校之，未著录者仅诗五章，而其为此本遗者凡六章，爰为写入目，注补字，以资区别。其中涂乙，朱墨烂然，确出先生之笔，字句增损与刻本颇有异同，评者为上杭刘氏，谢山全氏，可宝也。张君伯頌拟刻入《四明丛书》，及竭一日力，为分卷八，署曰《石园》，仍其旧也。慈谿冯贞群题记，癸酉岁不尽七日。

湛园未定稿

(清) 姜宸英撰 清二老阁刻本

《湛园未定稿》六卷，初印本，有“鉴沙珍藏”、“伴梅”二印，为吾乡顾鉴沙先生櫚旧藏。顾字嵩乔，诸生，工吟咏，擅绘事，少年聚书万卷，搜罗古今秘玩，构精舍为伴梅草堂，著作凡四十二种，县志有传。向王仲邕师和之假得其先人文甫先生定祥手校本，有旧本序目赠徐顺德序，乃景补之，复用朱笔移写校语於此册。文甫先生刻有《姜先生全集》，是书为其底本。姜氏文集以未定稿为最精，盖湛园所自定者，曰未定，谦词也。癸亥岁不尽十日冯贞群。

癸未十一月望后，见残本于城中旧肆，检叙目，颇与近通行本不同，因购归校之，文目为近本所无者十五首，秦序款识亦与近本异，故为补装附于此下，而深惜此十五首文之全佚也。然因此物色，未必不终得之，文字有灵，庶几旦暮遇之乎！是岁十二月二十四日纓云书于修川之小住为佳之室。

兼山堂集

(清) 陈介眉撰 郑梁选 清康熙间刻本

全谢山称：介眉诗、古文辞粹然有道，所养大醇，盖其受学梨洲，夙有师承，故不失矩度。所著《兼山堂集》八卷，见《培林堂书目》，清乾隆间《四库》列入附存目中。顾其故里流传绝少，是本于己酉二月得之甬上，书缺有间，近在书肆见写本是集，乃假归补写入之。

梨洲所撰墓志，寒村所撰行状，暇时均当写入。是书卷端有“万学诗常伦氏”、“徐印时栋”、“徐十三”、“同叔”、“烟屿楼”、“六一山房藏书”诸印记。所藏之家首为万氏、次徐、次董，予则从董氏而得者。

万学诗字冠南，号素蕖，为贞一言曾孙，有《卧钟斋诗文集》二十卷。四年七月七夕冯贞群。

鲒埼亭集

（清）全祖望撰 清刻本

全谢山吉士，承东发深宁之传，该览学籍，多识典故，表章明季死事遗民，当忌讳之世，侃侃而谈，略无顾念，诚豪桀之士也。其文信笔直下，不屑修词，质胜文则野，孔子所以从先进欤。晚年与杭堇浦交恶，杭序其集，颇有微辞，志马秋玉墓有句：

“甬全吉士被染恶疾，悬多金以励医师。”马氏兄弟与谢山交好，考佩兮甲戌送谢山诗云：“痼疾乘时療秋玉”。乙亥怀谢山诗云：“三春怀痼疾”。此杭氏说所从来。夫行如伯牛，可以止矣。斯人斯疾，不害其为伯牛也，不必为谢山讳。

谢山序黄南山《传家集》曰：“信笔直道其胸之所有，勤勤恳恳，先生虽不自预于能文之列，而读其文者不当以文观之，盖皆其心之自得，而非浮虚剽袭之言。顾世之所尚者文而已矣，太羹腥鱼之味，非甘口腹者所知，大帛大布之衣，非侈文绣者所恶也”。此序不啻为自己说法，解此者可以读谢山文矣！

谢山《董幼安神道表》、《王蔦庵墓碑》、《姜湛园墓表》都未上石，盖其意在阐发幽光，以作史料，集中墓志、庙碑、石刻多无不厘此也。

《经史问答》十卷，乾隆三十年鄞万近蓬福（九沙第三子、诸生、受业杭世骏之门、工诗。）校刻于杭州，冠以世谱，弟子董小钝为之跋。《内集》三十八卷，乾隆三十七年董小钝刻，前四卷（封面题全谢山太史著《鲒埼亭集》、春雨楼藏板，偶太史非法）传本极罕。嘉庆九年，余姚史竹房梦蛟得谢山手定本，再刻之，购获《经史问答》版片（去上下黑口，补以《鲒埼亭集》四字，每卷目下增余姚史梦蛟重校七字）合印行世。《外编》五

十卷，嘉庆十六年萧山汪因可继培刻之，以其表扬遗民，恐触文纲，不敢署名，此《鲒埼亭集》发刻之序也。

是书为先府君遗物，卷首有朱印记，己未六月，介张丈蹇叟向缪艺风荃孙假得蒋樗庵学镛（仅《外编》一种）严修能元照评本，用朱笔过临此册。癸亥十月，从徐君弢士得谢山手稿《外编》卷六之十，以墨笔移写入之。甲子正月，向任翁沛斋假传钞樗庵批《内集》，复以朱笔过录蒋氏评点，至是始完。六年中阅《鲒埼亭集》凡经二过，匪曰读父书也。复采董春雨、钱甘泉、徐烟屿、李越缦诸跋为《附录》一卷。谢山广于交游，同时友人若二马、若二赵、若樊谢，若道古，若穆堂，投赠诗文，检其别集，当复不少，写官无人，俟之异日。

《鹤征后录》、《文献徵存录》、《先正事略》、《昭代名人尺牍小传》、《两浙輶轩录》、《国朝学案小识》、《鄞县志》诸传均宜补入，姑记于此，以当息壤。甲子三月二十一日灯下冯贞群。

宋名家词

（明）毛晋辑 清初味开轩重印汲古阁刻本

毛斧季《汲古阁秘本书目》集部《宋词一百家》未曾装订，已刻者六十家，未刻者四十家，俱系秘本精抄。又《元词》二十家，精抄，尚未装订。据此，毛氏六十一家词为未竟之绪。谦牧堂所藏当即汲古阁奇零之本也。乙丑闰四月冯贞群记。

是本版片后归常熟小东门兴贤桥邵氏，殆即所谓味开轩者。板毁于火，惟存晏殊《珠玉词》一家。毛氏刻有李清照《漱玉词》一卷，朱淑真《断肠词》一卷，两种皆入《诗词杂俎》不附斯集。甲子仲冬八日冯贞群识。

彭元瑞知圣道斋读书跋云：“于谦牧堂藏书中得宋元人词二十二帙，题曰《汲古阁未刻词》，行款字数与已刻《六十家词》

同，每帙钤毛子晋诸印，皆精好。”据此，则是集毛氏尚拟续刻也。仲冬月晦孟颢又记。

津逮秘书

（明）毛晋辑 明崇祯十一年汲古阁刻本

《津逮秘书》存百二十七种，五百七十卷，二百二十二册，明毛晋汲古阁刻本，曾藏鄞卢址家，册有抱经楼印记，佚十六种，百七十四卷。奸贾别刻目录，冒充全书，予寓目者计五、六部，均非足本。盖卷帙浩繁，易于分散。宣统纪元六月以金二百市於甬上，虽有脱佚，然其印刷极早，迥出他本之前，深足矜也。今写佚目列于下方，以为将来合并之地。戊午立夏后二日冯贞群识于伏跗室。

作者工作单位：浙江宁波市天一阁文物保管所

